



## U Sudu BiH nastavljeno suđenje Huseinu Bilalu Bosniću

# Prikazane fotografije bh. državljanina s ratišta u Siriji

Krajem 2013. SIPA intenzivno počela prikupljati podatke o tim državljanima BiH


Ispitivanjem svjedoka Tužilaštva BiH Srđana Lazića, istražitelja Državne agencije za istrage i zaštitu (SIPA), u Regionalnom uredu u Tuzli, u Sudu BiH nastavljen je glavni pretres u predmetu protiv Huseina Bilala Bosnića, koji je optužen za javno poticanje na terorističke aktivnosti u vezi s vrbovanjem radi terorističkih aktivnosti i organiziranjem terorističke grupe.

Lazić je kazao da je SIPA krajem 2013. godine intenzivirala aktivnosti na prikupljanju podataka u vezi sa bh. državljanima koji su otišli na ratište u Siriji. Bu-

dući da su primijetili, kako je kazao, da su te osobe aktivne na internet-portalima i društvenim mrežama, istražitelji su napravili Facebook profil i skidali fotografije, postove i snimke na kojima bh. državljanima "poziraju" s oružjem u rukama i odjeveni u vojne uniforme.

U sudnici su potom prikazane fotografije državljanina BiH koji su poginuli na sirijskom ratištu, ali i onih koji se tamo još nalaze. Sve te fotografije prikupljene su na CD i dostavljene Tužilaštvu BiH.

Tako su na slikama prikazani Azmir Ališić, Sejdin Omerdić, Emrah Pilipović,



*Pilipović poginuo na sirijskom ratištu*

Samir Begić i Nusmir Pjanić, koji su poginuli na sirijskom ratištu, potom Emrah

Fojnica, koji je poginuo u Iraku, te Amir Džinić, koji je trenutno teško ranjen. Na jednoj od fotografija nalaze se i Muhamed Keserović, Senad Hasanović, Mevludin Ahmetpahić, Bajro Ikanović, Edin Alijević, Elvis Hajrić, Ines Midžić, Jasmin Jašarević i Ramo Pazara, koji uz bh. ima i državljanstvo SAD. Lazić je pokazao na jednoj slici Edina Kahrimana s njemačkim reperom koji je, kako je rekao, prešao na islam.

Upitan nalazi li se na slikama Husein Bosnić, Lazić je odgovorio negativno.

Suđenje će biti nastavljeno 6. maja. **A.L.**